

La carta del apóstol San Pablo a los Colosenses

Pablo escribe a la iglesia de Colosas

1 ¹As Pábloat ba ac ayin carit uch cuihsuro. Asan Sir ajc cut Jesucristo chihtá ehcúquibro. Aját carit uchan ba acu ayin Timoteo jor cuihsuro. Timotéoan Jesucristo cutar is acu rabro. ²Baat Jesucristo chihtá cajac rehquít Sir ima uwro. Baan Sir im uw etar is acu cat rábinro. Ba Colosas pueblo cuitar itquin acu ayin carit uchan cuihsuro. Sirat Tetát ba sehnác etar aját ba cuitar ey ojcor conro. Ba obir yajcayta acu ba ohbac itayta acu conro.

La oración de Pablo por los creyentes

³Isat ba cuitar Sir ojcor etiti conro. Eyta cona rabar is Cara Jesucristo Tet quínoan, Sir quínoan “oquéy,” wacaro. ⁴Isat ba ojcor tew̄ ic rahcuít, baat Jesucristo chihtá ay cájacro. Baat Sir im uwan bahnaquin sehnacro. Eyta rahcuír ba ojcor Sir quin “oquéy,” wacaro. ⁵Ba Sir quin cuacúr bequic acor itic etar, Sir quin “oquéy,” wacaro. Baat récaji Sir chihtá uní bi cajac rehquít, ay bi cajac rehquít, ima quin bequic acor itro. ⁶Chihtá eya ba quin ehcuájquinro. Chihtá eya cajca bahnác cuitar uwat cat acsar, acsar tew̄ ic rahcuro. Eyta rahcuír uwan ur ay chácuro. Baat cat récaji ay rahcuír cájacro. Sirat uw sehnár yajquíc chihtá rahjacro. Etar ey chihtá rahcuír cájacro. Baat récaji rahcuír eyta cajca bahnác cuitar uwat eyta rahjacro. ⁷Epafrasat ba quin récaji ehcwayat cájacro. Epafras eya is cuitar Sir chihtá ruóquibro. Isat ey sehnacro. Eyat is cuitar Jesucristo chihtá wácati ehcuro. ⁸Eyat is quin ba ojcor bar ehcujacro. Baat uw sehnác chihtá ehcujacro. Sir Ajcan Cámuran Ey urá cuitar eyta ehcujacro.

⁹Eyta cuácayat isat ba cuitar conay raújacro. Baan eyta itic rahcuír car ba cuitar Sir ojcor conay yinjacro. Sirat ba urá wícaiyta acu, bow̄ wícaiyta acu conro. Sir ima urá cut, ima ajc cut baat bitara yajcátatara ey istayta acu ba cuitar conro.

¹⁰Sirat bitara itin wajáctara, baan eyta istayta acu conro. Baan Sir ub cahmar ur ay ítayta ac conro. Baat bitara útara ur ay yajcayta acu Sir quin conro. Baat Sir chihtá acsar acsar yají sínayta acu Sir quin chícaro. ¹¹Ba cuati acu Sir ima urán ajcan ba ur icar chácayta acu conro. Sir urán ajcan bahnaquin cuitatro. Ba Sir chihtá wácati acu eyta chácayta acu conro. Cahujinat ba ruhw̃ ú tacat, turti chácayta acu ahní chácayta acu eyta conro. ¹²Baat Sir quin Tet quin “oquéy,” waw̃ i. Eyat im uwa cuacúr beyin etar, is cat eyta beyin acu imáy chájacro. Isan Sir ima chihtá rahcua rabar ey uw owár tan wan itin chájacro. Wan quir cuitar tan wan itir eyta, eyin owár cat eyta itin ac chájacro. ¹³Isat récaji ur ay bár yajác rehquít checúm cuitar ítchaquinro. Cuatán ahra Sir imát Tet imát is sújacro. Siwir wan quir cuitar eyta it áyjacro. Im wacjá chihtá cuitar eyta it áyjacro. ¹⁴Waquíj ey chihtá cuitar isat tayar yajacan eyat bar túnjacro. Eyta cuácayat isat tayar yajacan tayar bár chájacro. Eyta tunjac chihtara isan ohbac itro.

La paz con Dios por medio de la muerte de Cristo

¹⁵Waquíj ey Jesucristo Siran im eyro. Siran ub cut ístajar cuar, ima wacjá ey itro. Ey ítitan, Sir cat im éytaro. Waquíj eyan cajc uch chajac bahnác cuitar bijinro. ¹⁶Waquíj eyat icuran biyan bahnác waquíj chájacro. Cuacúr abá cuitar cat, icuran biyan bahnác eyat chájacro. Cajc uch cutar cat icuran biyan bahnác chájacro. Ub cut istata bí cat, ub cut ístajar bí cat, bahnacan eyat waquíj chájacro. Ruiyin cat, uwir cat, Rurunín cat, Sisramin cat bahnaquin eyat waquíj chájacro. Im ey acu chájacinro. ¹⁷Eyra icuran biyan cajcan, cuacúr abán, bahnacan anto cuanti jácatan, im eyta ítchacro. Ey chihtá cuitaran bahnacan im eyta cuan bahcaro. ¹⁸Eyan Sir uw cájaquin ac cáraro. Eyatan ima uw quino urán tanan wícaro. Eyan sácajaquin tac icar bin récaji yehnjacro. Eyan bahnaquin cuitar chaquin ac eyta yehnjacro. ¹⁹Ey ur ícara Sir ajcan cámurán bahnác chájacro. Sir iman bitáratara, ey cat eyta rehquín acu chájacro. Sirat eyta cha cun rehquít eyta chájacro. ²⁰Eyat eyta yajác cuitaran Siran bahnaquin owár tan wan chácáro. Eyan caruc ojcor chinír cuitaran cuacúr abá bin cat, cajc uch cut bin cat, Sir owár tan wan chácáro. ²¹Ba cat tan wan chájacro. Ba récaji Sir jor tan wan bini batro. Sir quehsí binro. Baat récaji Sir tayar yajáquinro. ²²Eyta cuar ahra Jesucrístoat Siran ba jor tan wan chájacro. Eyan sibár ji chinír cuitar tan wan chájacro. Sir ub cahmar ima uwa yin ayin acu, ur ay chac ayin acu, orac rehec ayin acu, tayar bár rehec ayin acu eyta chinjacro. ²³Baat Sir chihtá rahjáquinat ur istán cuitar tehmoti, etiti cácat, Siran ba jor tan wan rehcaro. Baat Sir chihtá wácati cuácayat, ba jor tan wan rehcaro. Chihtá eya cajc uch cutar itquin bahnaquin cuacájá acat bar ehcujacro. As Pábloat cat ey chihtá ehcuro.

Pablo encargado de servir a la iglesia

²⁴Aját ba ac ay yajquíc ques uwat as ruhw̃uro. Eyta ruhw̃uyat, asan ahniro. As sibár uchan ruhw̃uyat, Jesucristo ruhw̃úr eyta ruhw̃uro. Jesucrístoat im uwan ur ay chaquin ac ruhw̃ujác eyta, acsar as cat eyta ruhw̃uro. Eyta jaw̃

bahnác caba ruhw̃uro. ²⁵Asan Sir im uw acu cacúm chájacro. Sir ajc cutara eyta chájacro. Ba quin Sir chihtá caba ehcún acu asan ey chájacro. ²⁶Chihtá eya récaji úchicrias istiti biro. Cuatán ah cutar Sir uw quin bar ehcujaero. ²⁷Im uw quin ehcún sehwar eyta ehcún acu wajacero. Judío bár bin acu cat Sirat ay yajác chihtá ehcún sehwar eyta ehcún wajacero. Chihtá ey uw quin istá ay cun rehcuar, récaji istítiro. Chihtá ey cuitar Jesucristo bowan ba ur icar chácaro. Eyta chac etar Sir ima owár cuacúr itay beyic acor itro.

²⁸Jesucristo ojcor bahnaquin quin wacaro. Eyta waca rabar bahnáquinat Sir chihtá rahcuayta acu tew̃ro. Bahnáquinat ey tamo ay síhw̃ayta acu siw̃ro. Uw bahnaquin Jesucristo chihtá cuitar urán cuít rehcuayta acu siw̃ro. ²⁹Uwan eyta rehquín acu ajmár cuitatrun ruoro. Sirat as ur icar chihchirán cuít chajac cuitar ajmár cuitatrun uw quin ey chihtá ehcún acu ruoro.

2 ¹Aját ba quin uch istá ay cun rehquít ehcuero. Aját ba cuitar Sir ojcor conro. Ajmár cuitatrun conro. Laodicea pueblo cuitar itquin cuitar cat eyta conro. Sir uwat as istiti bin cuitar cat conro, ajmár cuitatrun. Bahnaquin cuitar eyta conro. ²Eyin rahra rahra sehnác ítayta acu, ohbac ítayta acu eyta conro. Sehnác ityat, ohbac ityat éyinat Sir chihtá orac rahcuáyqueyra. Caba rahcuáyqueyra. Eyta rahcyat, récaji Sir chihtá istiti ey istáyqueyra. Jesucristoat yajác chihtá istáyqueyra. ³Jesucristo chihtá cut Sir urá bowa bahnác istátaro. ⁴Cahujinat chihtá istiy siw̃ro. Chihtá ey ay binir cuar éyinat ba cayar yajcátaro. Eyta cuácayat éyinat ba cayar yajti ac aját ba quin récaji ehcuero. ⁵Asra cajc istiy cuar, ajmár ur icar ba tamo séhw̃aro. Ba tamo séhw̃atan, baat yajcata bi yajcaro. Jesucristo chihtá cajac wácati itro. Eyta ítyatan, asan ahniro.

⁶Eyta bira ba urá Jesucristo icar chajac rehquít ey owár etiti ítuwi. Ur istán chaw̃i. ⁷Chihtá sinjac ey wácati acu ey owár etiti ítuwi. Acsar cat ey owár ur istán chaw̃i. Eyta chácuayat ba cuaca báreyra. Ba urá tehmó báreyra. Sir quino cat “oquéy,” etiti waw̃i.

La nueva vida en Cristo

⁸Cahujinat ba cayar yajca rácatro. Cahujín éyinat imár chiwa chaquin acu ba ahár caca racar rehquít ba cayar yajquín yajcaro. Imár chihtá cut siw̃ir cuitar, imár urá cut siw̃ir cuitar, ba cayar yajquín yajcaro. Cuácayat Jesucristo chihtá uní quen eywan ba quin cac áytiro. Cuatán cuacúr abá ub chauwa sásorin chauwa siw̃ro. Cajc uch cutar caquin chauwa, ruiyin chauwa siw̃ro. Eyta siw̃yat ria cati jaw̃i. ¿Éyinat ba cayar yájcajaqui? ⁹Jesucristo sibár ícara Sir iman bahnác chájaquinro. Eyan Sir ima quényero. ¹⁰Ey urá cutar chihtá cuitar ba Sir ub cahmar caba orac chájacro. Tayar bár chájacro. Eya ricmín cuitar Sisramin cuitar bahnaquin cuitatro. Eyat eyin bahnaquin burbar yajacero.

¹¹Ba umá cuijacan wan yajacero. Ba urá Jesucristo icar chaquir cuitar, Sir ub cahmar ba umá cuiquir éytaan wan chájacro. Ba umá cuiquir éytaan wan cuaquir ba umá uw at cuti cuítiro. Judíoinat Sir ub cahmar ur ay chaquin sihw̃ar

umá cuicaro. Ba cat urá Jesucristo icar chájac rehquít, umá cuiquir éytaan wanro. Ey icar chájac rehquít ur ay bár yajquíc et bahjacro. Etar Jesucristo chih tá cut ba umá cuiquír éytaro. ¹²⁻¹³Ba récaji ur ay bár yajacro. Récaji judío bár bin rehquít Sir chih tá itisti binro. Eyta rehquít Sir ácuí ba sácajacan wan ítchacro. Sir jor ténati ítchacro. Etatra ba rih sar siw'ír cuitar, Sir ub cahmar Jesús ruhcuír eyta ba cat eyta chein ruhjáquinan wan chájacro. Acsar cat ba cat Jesús jor sicor yehnarán wan chájacro. Baatán Siran ajcan urán cuít síhwáro. Eyta síhw'ayat, Sirat ítitan, chein ruhcuír car sicor estají yinjáquinan wanro. Sirat Jesús sácajaquin tac icar bin yehn áyjacro. Ba récaji sácajacan wan cuar, baat tayar yajacan Sirat sicor tayar bár chájacro. Eyta chaquir car ba ur icar ima chih tá chájacro. ¹⁴Jesucristo isat tayar yajác tunin chinjacro. Isat tayar yajác ques is cahm téw'queyan ahra acsar téw' ayti sutchacro. Caruc ojcor chinír cuitar eyta sutchacro. ¹⁵Eyat bahnaquin, Sisramín, rusamin burbar yajacro. Burbar yajquír car uw ub cahmar cuayir chájacro. Soldádoat quehsí bin burbar yajquír car uw ub cahmar questár chaquir eyta, Jesucrístoat cat Sisramín rusamin eyta chájacro. Caruc ojcor chinír cuitar eyin burbar yajquír car eyta chájacro.

No dejen a otros criticarles por su libertad

¹⁶Eyta bira cahujinat ba cahm icar tew'yat, ey tamo síhw'ati jaw'í. Cahujinat baat bach aujác ria tew'yat, rahcti jaw'í. Ira yati bach, sima yahti bach aujác ria tew'yat, fiesta eyin owár yajti ques tew'yat, sihyór bucoy istiyát bach aujác ria tew'yat, tan jaquin rícará bach aujác ria tew'yat, rahcti jaw'í. Eyta tew'yat ria cati jaw'í. ¹⁷Récaji bach yajquíc ey Sir chih tán wan cuaquir cat Sir chih tá queney batro. Ahra ajcá batro. Jesucristo Sir tayar tunin ac uw cuitar chinjác chihtrún Sir chih tá quéneyro. ¹⁸Uwat ba quin “Bach auyat Sir chih tá ruhw'uro,” wacáyatra, eyin ria cati jaw'í. Uw éyinat wácuano: “As quin cámsiris cuitar ehcujac etar, as chih tá rahcwi,” wácuano. “Behmár cuayin rehquít Sir cacmín ojcor conwí,” wácuano. Eyta wacayat, eyin ria cati jaw'í. Uw éyinat imár chih tá cuitar síhw'ac reht ay síhw'atiro. ¹⁹Uw éyinat Cara Jesucristo chih tá sicor bar waca téjcro. Jesucristo eyan Sir uw bahnaquin acu cara yehnjacro. Jesucristo imatan urán cuít chácáro. Chih tá tehmo áytiro. Ey chih tá cuitar Sirat acsar acsar cuít siw'ro. Sir im uwan ey sibarán wanro.

²⁰Baan Jesucristo owár chiniran wanro. Eyta cuácayat chéinat chih tá ráhcuajar eyta, ba cat Sisramín, rusamin chih tá rahcti jaw'í. Ba Jesucristo owár chiniran wan cuácayat, ¿bitar reht eyin chih tá cuitar itca? ¿Bitara reht eyin chih tá ráhcuica? ²¹Eyin chih tá cuitar baatán icúrtara bútati, icúrtara catoti, icúr bi cac sar chati báchuro. ¿Bitara reht eyin chih tá cuitar eyta báchuca? ²²Icúrtara bútati, icúrtara yati uw imarat bach yajcaro. Eyta cohti bach, eyta bútati bach bar bahnátaro. Bach ey bahnín acu waquír chájacro. ²³Uw imár tan síhw'at, bach yajcáyatan caba yajc síhw'aro. Eyinat síhw'at: “Sir queney tamo síhw'an ac bach yajcátaro,” síhw'aro. Cuáyinan wan cat chácataro. Imár ojc cat ruhw'átaro. Eyin tanra eyta síhw'aro. Eyta síhw'a cuar isár yajti acu, ay bár yajti acu chih tá ey sinic cuar cat cábai batro. Cuayar sinro. Sinic cuar ey chih tá cuitari eyta yajquíc étajatro.

Busquen las cosas que son del cielo

3 ¹Jesucristo chinír sicor estají yehnář eyta ba cat eyta ey jor yiniran wanro. Eyta bira chihtá cuacúr bin ayjac yajca racar rehŵi. Jesucrísticoan Sir jor cuacúr itro. Eyan bahnaquin cuitatro. ²Baatán chihtá cuacúr bin ayjac ey yajca racar rehŵi. Cajc uch cut bin chihtá yajca rácara isoti jawĩi. Chihtá cuacúr ey tamo etiti síhŵawi. ³Ba sácajacan wanro. Sácajacan wan cuar ahra sicor Sirat estají chácáro. Ba urá Jesucristo icar chajac rehquít, eyta estají chácáro. Ba estají cha cuar áhajira uwat istítiro. ⁴Baan Jesucristo urá cut ohbac etiti itro. Eyta cuácayat Jesucristo eya cajc uch cut uw ub acat wicayat, ba cat ey owár uw ub acat carin yináyqueyra.

La vida antigua y la vida nueva

⁵Eyta chihtara, ba sácajacan wan rehquít, cajc uch cut ur ay bár binat yajquír eyta yajti jawĩi. Uw besir yajquíc ey et bahwi. Isár yajquíc ey et bahwi. Yehŵti bin jor cuic cut questa camic ey et bahwi. Cahujín owár cuic cut questa cama racar isóc ey et bahwi. Cahujinay ey behmaray chaca racar isóc ey et bahwi. Cahujinay racar isóyeyra, Sir táyatro. Sirir ojcor conic ur ay bár yajquír éytaro. ⁶Uwat Sir chihtá rahcti eyta yajcayat, Sirat uw cuécwayqueyra. ⁷Baat cat récaji eyta yajacro. Baan eyta yajca rabar ítchacro. ⁸Eyta cuar ahra eyta yajquíc etwi. Turic ey et bahwi. Tecuas ey cat et bahwi. Cahujín quehsúc ey cat et bahwi. Cahujín ojcor ajc ay bár tewĩc ey cat et bahwi. Ahsín sihrúc ey cat et bahwi. ⁹Baat rahra rahra tewĩyat sinic ey cat et bahwi. Baat cahmor ur ay bár rehjec cuar, ahra bar tehmojocro. Eyta chihtara baat rahra rahra tewĩyat sinti jawĩi. ¹⁰Ahra urán ay tehmojocro. Urá tehmar cuitar acsar, acsar sin becaro. Sir im owara chac beya rabar, ey chihtá acsar, acsar sin becaro. ¹¹Eyta cuácayat Sir ub cahmor judío bár bin cat, judfoin cat im éytaro. Umá cuijác bin cat, umá cuiti bin cat im éytaro. Cajc istiy uw cat, sinjac bin cat im éytaro. Uw cacmín cat, uw carin cat im éytaro. Jesucrísticoan bahnaquin aratro. Bíyinat ey chihtá rahcyat eyin bahnaquin ur icar im urá chácáro.

¹²Ahra baan Sir imáy chájacro. Sirat ba sehnác rehquít imáy cájacro. Eyta cuácayat, baat cuayin sehnác chawĩi. Cahujín ac ur ay yajwĩi. Behmaran bahnaquin cuitar síhŵati jawĩi. Tecuas bár jawĩi. In turti ítuwi. ¹³Baan rahra rahra turti jawĩi. Séoti jawĩi. Istiyát ba ac ur ay bár yajác tacat ba tan wan chawĩi. Sicor ténawi. Sirat baat tayar yajác eyan sicor tayar bár chajac chihtara, baat cat cahujinat tayar yajác sicor tayar bár chawĩi. ¹⁴Eyta yajquír cuitar acsar cat uch yajwĩi. Cahujín sehnác chawĩi. Eyta sehnác chácayat, chihtá cahují bahnác caba yajcáyqueyra.

¹⁵Jesucristo chihtá cuitar baan ohbac jawĩi. Ur icar sehŵa sácati chawĩi. Ba bahnaquin sehŵa sácati ac eyat ba uw istán chaquin ac cájacro. Ba Sir quin “oquéy” wawĩi. ¹⁶Ba urá Jesucristo icar chawĩi. Ba rahra rahra urá to bi cuitar ajc uní siwĩi. Rahra rahra urá to bi cuitar ajc uní cuitar wawĩi. Eyta siwĩa rabar eyta waca rabar, Jesucristo icar urá chawĩi. Sir carit Salmo cat cohwi. Sir ojcor

cat ay cohwi. Eyta cohwa rabar ba urá icar “Sirat as obir yajacro,” síhwawi.
 17Baat bitara útara yajquítara, bitara útara waquítara, Cara Jesucristo
 chihotá cuitar ay yajwĩ. Ay wawĩ. Sir quin “oquáy,” waca rabar eyta yajwĩ.

Deberes sociales del cristiano

(Efesios 5.21-6.9)

18Wiwĩinu, behmár rain ria cawĩ. Sirat wiwĩinat eyta caquin acu
 waquíur chájacro.

19Ráinu, ba wiya sehnác chawĩ. Eyin tec ajc cut ayti jawĩ.

20Sasú, ba tetín abín chihotá yajwĩ. Bitara útara yajc ayat, eyta yajwĩ.
 Eyta yajcayat, Siran ahní rehcaýqueyra.

21Tetínú, ba sasá tec chiti jawĩ. Eyta tec chíyeyra, eyin cue rehquíur ba
 ria cácajatro.

22Uw cacminú, cajc uch cut carin chihotá yajwĩ. Eyin ubot étani ay yajti jawĩ.
 Eyin ubot ay waan acu étani ay yajti jawĩ. Cuatán ur istán cuitar carin chihotá
 yajwĩ. Sir cahmar ayú rehquíur eyta yajwĩ. 23Icuran biyan ruótatara, ay ruowí.
 Uw ahní chaquin ac étani yajti jawĩ. Cuatán Sir ima ahní chaquin acu eyta yajwĩ.
 24Sir imat im uw quin wiquín wac bahjáe eyan ba quino cat wícata síhwār ohca
 sinti ruowí. Sir im acu cat canar yajquíc síhwār eyta ay ruowí. 25Cuatán ur ay bár
 yajquíc tehmotra Sirat cuéwayqueyra. Sirat íítan, cacminát cat, cárinat cat bitara
 útara ay bár yajquíc tehmatra, bahnaquin im eyta cuéwayqueyra.

4 1Cárinu, behmár cacmín ruhw̄uti cuar, cayar yajti eyin ac ay yajwĩ.
 Ba cat cuacúr abá cuitar cara ji síhw̄a rabar, eyta ay yajwĩ.


Otras instrucciones

2Baat Sir ojcor bucoy bucoy etiti conwi. Eyta conic séoti jawĩ. Sir tamo síhw̄a
 rabar conwi. Cona rabar cat Sir quin “oquáy,” wawĩ. “Baat as obir yajacro,” wawĩ.
 3Is cuitar cat Sir ojcor conwi. Isat Sir chihotá ehcwayat, uwat rahcuayta acu conwi,
 Sir ojcor. Jesucristo chihotá récaji ehcuti bi ehcwayat, uwat orac rahcuayta acu
 conwi. Jesucristo chihotá ques as cárcel icar tunjacro. 4Cahujinat orac rahcuayta
 acu aját ay ehcwayta acu Sir ojcor conwi. Aját eyta ay ehcwá rácatro.

5Cahujín Sir tamo síhw̄ati bin acu cat ay yajwĩ. Baat ay síhw̄ar caba bi yajwĩ.
 Cuáyitra yajti jawĩ. 6Baat cuáyitra ria batra tew̄ti jawĩ. Cuatán úwatan baat
 tew̄quey orac rácuayta acu tew̄i. Uwat ba quin táyoyat, bitara wacátatara ey sinwi.

Saludos finales

7Sera ajca Tíquicoat ba quin cur car, is ojcor bahnác ehcwáyqueyra.
 Tíquico eya is rábitro. Eya uwat sehnacro. Eya Sir uw ac is owár ruóquibro.
 8Aját ey erar ba quin ayro. Eyat ba quin is ojcor ehcún acu ayro. Eyat
 ba tan wan chaquin acu ayro. 9Ey jor Onésimo cat ayro. Onésimo eya
 ba owár binro. Eyat Sir chihotá wácati cácaro. Ey cat uwat sehnacro.
 Onésimoat cat, Tíquicoat cat usara bitara íitictara ba quin ehcwáyqueyra.



(Colosenses 4.13)

¹⁰Aristárcoat cat ba tamo sehṽac wac ayro. Aristarco eya asi jor cárcel icar tunjacro. Bernabé rab Márcosat cat ba tamo sehṽac wac ayro. Marcos ey ojcor ba quin bar ehcujaquinro. Eya ba quin cucayat, ubach cat, ira cat wiwĩi. Eya ajcá ji chawĩi. ¹¹Ser istiy ajcá Jesusat ba tamo sehṽac wac ayro. Ey ajc istiy “Justo” aṽuro. Serin eyin judfoin sícara bin batac binat Sir cara rehquey chihotá ehcún ac as cuitar ruóquinro. Serin éyinat as cuitar yajác etar as tan wan rehjecro. ¹²Epáfrasat cat ba tamo sehṽac wac ayro. Epafra eya ba owár binro. Jesucristo chihotá ruóquibro. Eyat ba cuitar Sir ojcor etiti conro. Ba urán cuít rehcyta acu, baat Sir chihotá tehmoti yajcayta acu conro. ¹³Aját uw cac cahmar ey ojcor ehcuro. Eyat ba cuitar cat, Laodicea pueblo itquin cuitar cat, Hierápolis pueblo itquin cuitar cat Sir ojcor cuít conro. ¹⁴Lúcasat cat ba tamo sehṽac wac ayro. Lucas eya médicoro. Uwat Lucas sehnacro. Démasat cat ba tamo sehṽac wac ayro. ¹⁵Aját cat ba tamo séhṽaro. Sir uwa Laodicea pueblo itquin tamo cat séhṽaro. Eyta wac ayro. Ninfa tamo cat, ey úsara sécuaquin tamo cat séhṽaro. ¹⁶Ba cucajá acat carit uch tar car, acsar Sir uw Laodicea cuitar itquin acu cat aywi. Eyin cucajá acat ta aywi. Eyta ayir car carit istiy Laodicea itquin acu ayjac ey cat baat tawi. ¹⁷Baat Arquipo quin uchta wawĩi: “Sirat ba quin yajc áyjaquey, wácati caba yajwĩi,” wawĩi. ¹⁸Asa Pábloat uchta ajmár at cut cuihsuro. As cárcel icar tunjac chihotá tan chinti síhṽawi. Aját ba cuitar Sir ojcor conro. Ba sehnác chácayta acu, ba obir yajcayta acu conro.